

NO. SOALAN: 28

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**DARIPADA : DATUK AARON AGO ANAK DAGANG
[KANOWIT]**

TARIKH : 20.3.2018 (SELASA)

Datuk Aaron Ago Anak Dagang [Kanowit] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan kejayaan atau keberkesanan dasar dan program penyeragaman harga barang keperluan di luar bandar Sarawak. Berapakah peruntukan setiap tahun untuk program tersebut mengikut negeri.

JAWAPAN:

Tuan Yang Di-Pertua,

Untuk makluman Dewan yang mulia ini, KPDNKK telah melaksanakan program penyeragaman harga sejak dari tahun 2009 sehingga kini. Menerusi program ini, Kementerian akan membiayai kos pengangkutan tujuh (7) barang iaitu **beras, gula, minyak masak paket 1kg, tepung gandum kegunaan am, gas petroleum cecair (LPG), petrol RON 95 dan diesel** dari pembekal di kawasan tersebut ke kawasan pedalaman. Program ini dapat mengurangkan jurang harga antara kawasan bandar dan pedalaman, sekaligus membolehkan penduduk mendapatkan barang tersebut pada harga kawalan yang seragam di seluruh negara.

Sebelum pelaksanaan Program ini, harga tujuh (7) barang ini adalah berbeza mengikut kawasan. Sebagai contoh, harga bagi Gas Petroleum Cecair (LPG) (14kg) di Baram adalah RM130.00 satu tong dan RM47.00 di Kanowit. Melalui pelaksanaan Program ini, penduduk di Kanowit dan Baram dapat membeli Gas Petroleum Cecair (LPG) (14kg) pada harga yang seragam iaitu RM26.60 satu tong.

Jumlah peruntukan kewangan untuk melaksanakan program ini adalah sebanyak **RM210 juta** bagi tahun 2016, **RM178 juta** bagi tahun 2017 dan **RM170 juta** bagi tahun 2018. Daripada jumlah tersebut, kos program di kawasan parlimen P220 Baram adalah sebanyak **RM36,984,570.00** bagi tempoh 2016 hingga 2018.

Dalam melaksanakan Program ini, terdapat cabaran dari segi memastikan tiada ketirisan penghantaran barang ke *Point of Sales* (POS) yang terlibat. Program ini melibatkan lebih daripada 4,000 POS

yang berada di kawasan pedalaman yang jauh dan sukar dihubungi. Operasi pemantauan melibatkan kos yang tinggi dan sumber manusia yang ramai. Berdasarkan kedudukan kewangan dan sumber tenaga sedia ada, Kementerian hanya mampu memantau sebahagian sahaja POS. Di samping itu, Kementerian telah mengambil tindakan dengan melaksanakan pemantauan bersama agensi Kerajaan yang lain, Pihak Berkuasa Tempatan dan pemimpin-pemimpin tempatan bagi membendung ketirisan.

SOALAN (29)**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN: LISAN

TARIKH : 20 MAC 2018
[SELASA]

DARIPADA : YB TUAN M. KULASEGARAN
[IPOH BARAT]

SOALAN :-

YB Tuan M. Kulasegaran [Ipoh Barat] minta **PERDANA MENTERI** menyatakan mengapakah Kerajaan telah menangguhkan hasrat untuk meningkatkan pemilikan ekuiti untuk golongan kaum India dari 1.2% ke 3% dari tahun 2010 kepada tahun 2020. Apakah pemilikan ekuiti untuk golongan kaum India di seluruh Malaysia pada masa kini.

JAWAPAN:

Tuan Yang di-Pertua,

Untuk makluman Ahli Yang Berhormat, YAB Perdana Menteri telah melancarkan Pelan Tindakan Masyarakat India (MIB) pada 23 April 2017, sebanyak 34 KPI telah ditetapkan untuk dicapai dalam masa 10 tahun. Diantara sasaran utama dalam Pelan Tindakan Masyarakat India adalah untuk melancarkan saham ekuiti PNB, mencapai sekurang-kurangnya 7% penjawat awam India, mencapai kemasukan IPTA sekurang-kurangnya 7%, memastikan kumpulan B40 masyarakat India berdaftar di bawah skim-skim bantuan kerajaan seperti E-Kasih dan program-program pembangunan sosioekonomi melalui peningkatan kapasiti masyarakat India. Demi melaksanakan program –program yang dimaksudkan, SEDIC telah distruktur semula dengan penambahan perjawatan dan sumber-sumber yang sewajarnya.

Dalam usaha meningkatkan ekuiti kaum India, pengagihan 1.5 bilion unit tambahan Amanah Saham 1Malaysia (AS1M) untuk masyarakat India, terhad kepada 30,000 unit setiap pelabur, telah dibuka untuk langganan bermula 29 Januari 2018 dan kerajaan juga memperuntukkan pembiayaan

khas RM500 juta bagi tempoh lima tahun dalam bentuk skim pinjaman tanpa faedah untuk 100,000 isi rumah untuk kadar masa 5 tahun.

Perubahan lanskap ekonomi pada 2010 telah menjadikan penyertaan 3% ekuiti kaum India menjadi tidak relevan. Ini adalah memandangkan masyarakat India mempunyai lebih aset tetap dan aset berubah berbanding dengan ekuiti pasaran kapital. Ini adalah kerana elemen pelaburan di dalam sistem ekonomi kapitalis tidak melihat kepada bangsa dalam kapasiti pelaburan seseorang individu memandangkan pasaran saham adalah terbuka dan peluang bagi setiap individu adalah sama.

Sekian, terima kasih.

Mac 2018